

# El è strebel cun plets e creescha films

La vernissascha dal cudesch da Clo Duri Bezzola ed ina sala plaina a Turitg

■ (anr) Sch'ina poesia dad el cuntegn ventg plets, alura è Clo Duri Bezzola gia stà baterlus. Quest'eman ha il poet biling prelegi a Turitg da ses nov cudesch. La prelecziun è da medem temp er stada la vernissascha da «Il blau engulà». Il local che la libreria Schulthess aveva organisà è stà bain plain. Ultra da poesias en dus linguatgs èn ils auditurs er vegnì survì cun musica dal saxofonist turitgais Nathanael Su. Omadus artists, quel dals tuns musicals e quel dals tuns literars, han ils auditurs tedlà cun devotziun.

## Poesias u far strieggn cun plets

Cun vusch calma legia Clo Duri Bezzola ina poesia. Igl è paucs plets ch'el pronunziescha plaunsieu. El fa ina pausa suenter quatter plets per che l'auditor possa sviluppar il maletg intern che tutga tar quests plets. Alura aschunta il poet trais novs plets, il maletg intern da l'auditor cumenza a sa mover sco en in film.

Ma ils davos plets bittan tut las associazions fatgas sutsura u dattan al «film» ina fin nunspitgada. Intginas poesias da Bezzola dessegnan maletgs

fitg clers. Mintga pled è tschentà el dretg lieu cun ina precisuni frappanta. Ed il poet sa deporta sco in racher che na po quir al lectur betg in pled da memia.

## Tutgar la noda sin vias pulainas

Autras poesias da Bezzola sumeglian in sdratsch ch'è biss nà sco per casualitad. Ma questas casualitads han sias malizias.

Tge che para casualitad scuviera il lectur tuttenina sco intenziun che maina el, sco la mamma in uffant pitschen, en la direcziun giavischada. Il lectur u l'auditor sa legra: «Ah, en questa direcziun vai, uschia manegia il poet quai.» Ma per ordinari sa legra il lectur memia baud. Clo Duri Bezzola aschunta paucs plets che midan puspè tut, dattan ina outra direcziun al «film» u che rumpen il maletg en milli scalgias.

Ed uschia stat a la fin d'ina tala poesia da Bezzola la dumonda: «Èsi uss manegià uschia u uschia u anc ina giada auter?» Ins stat sco avant ina cruschada, ina cruschada ch'è dat milli vias che partan. Fascinant tar las poesias da Bezzola è ch'ins na sto betg decider tgenina via ch'ins vul prender sut ils pes. Il poet ha intenziunà tuttas pussaivladads, vuli svegliar tants patratgs, vuli irritar. Gist cun quai ha el forsa tuttina prendì en mira be ina solia chausa e grategià en il nair: Far smargigliar ses lectur.

## Scuidanza e luschezza sin il poet biling

Tranter ils auditurs a la prelecziun sa chattava er il directur da la Pro Helvetia Bernard Cathomas. El n'ha betg laschà prender da preschentar sez l'autur rumantsch che scriva cun success tudestg. Che Bezzola scrivia tudestga haja provocà duas differents reacziuns en la Rumantschia, ha Cathomas explitgà tranter spass e da tschert. Ina reacziun saja stada scuidanza: La scuidanza che Bezzola sappia insumma scriver tudestg. L'outra reacziun saja stada luschezza: La luschezza ch'el saja abel da scriver tudestg. Er tschertas atgnadads che Cathomas ha observà tar ils Rumantschs ha el explitgà al public da Turitg: Quels che sappian bain tu-

destg sajan ils Rumantschs ils pli persuadids. E quels che discurrin main bain tudestg sajan Rumantschs main persuadids. Clo Duri Bezzola ha Cathomas descrit sco autor da teaters, da cudeschs d'affons e publicist critic ed engaschà. Clo Duri Bezzola saja oravant tut er in intermediatur da litteratura. Quai sco magister che dat curs da scriver u era sco commember dal cussegl da fundaziun da la Pro Helvetia. Er sche Cathomas sa legra dal success ch'il scriptur rumantsch ha en il territori tudestg ha el tuttina concludì cun ils plets: «Nus sperain che Clo Duri Bezzola scrivia adina puspè er rumantsch.»